

**ГЭР БҮЛИЙН ТУХАЙ ХУУЛИЙН ШИНЭЧИЛСЭН НАЙРУУЛГЫН ТӨСӨЛ
БОЛОН ХАМТ ӨРГӨН МЭДҮҮЛСЭН ХУУЛИЙН ТӨСЛҮҮДИЙН ХЭЛЭЛЦЭХ ЭСЭХ
ТАЛААРХ ХУУЛЬ ЗҮЙН БАЙНГЫН ХОРООНЫ САНАЛ, ДҮГНЭЛТ**

2023 оны 11 дүгээр
сарын 07-ны өдөр

Улаанбаатар
хот

Илтгэгч нь: Улсын Их Хурлын гишүүн Г.Амартүвшин

Улсын Их Хурлын дарга, эрхэм гишүүд ээ,

Монгол Улсын Засгийн газраас 2023 оны 11 дүгээр сарын 03-ны өдөр Улсын Их Хуралд өргөн мэдүүлсэн Гэр бүлийн тухай хуулийн шинэчилсэн найруулгын төсөл болон хамт өргөн мэдүүлсэн хуулийн төслүүдийг хэлэлцэх эсэх асуудлыг Хууль зүйн байнгын хороо 2023 оны 11 дүгээр сарын 07-ны өдрийн хуралдаанаараа хэлэлцлээ.

Хууль санаачлагч гэрлэх, гэрлэлт дуусгавар болох, гэр бүлийн гишүүний эд хөрөнгийн болон эд хөрөнгийн бус амины эрх, үүрэг, тэжээн тэтгэх, асран хамгаалах, харгалзан дэмжих, хүүхэд үрчлэхтэй холбоотой харилцаа, түүнээс үүсэх үр дагавар, тэдгээрийн эрх, хууль ёсны ашиг сонирхлыг хамгаалах харилцааг нарийвчлан зохицуулах, хүүхдийн эрх ашгийг хамгаалах зорилгоор хуульд заасан зарим тохиолдолд эрх хязгаарлах зохицуулалтыг тусгах, үүнээс үүсэх үр дагаврыг тооцож, оролцогчдын эрх ашгийг аль болох хөндөхгүй байх, хамгаалах зохицуулалтыг тусган хуулийн төслийг боловсруулсан бөгөөд хуулийн төсөл батлагдсанаар төрийн байгууллага болон иргэнд тодорхой хэмжээний зардал үүсэх тул хууль санаачлагч холбогдох хууль тогтоомжийн дагуу зардлын тооцооны талаарх судалгааг хийсэн байна.

Хуулийн төслийг d.parliament.mn цахим хуудаст байршуулан олон нийтийн саналыг авч байгаа болно.

Байнгын хорооны хуралдаанаар хуулийн төслийг хэлэлцэх үед Улсын Их Хурлын гишүүн Г.Амартүвшин хоёр тал харилцан тохиролцсон, эд хөрөнгийн маргаангүй, хүүхдийн тэтгэмжийн асуудлыг шийдвэрлэсэн тохиолдолд шүүхэд хандалгүй хялбаршуулсан журмаар, эсхүл бусад захиргааны хэм хэмжээний актаар гэрлэлт цуцлах боломж байгаа эсэх, Улсын Их Хурлын гишүүн Ц.Мөнхцэцэг хуулийн төслийг үзэл баримтлалын хүрээнд хэлэлцэхийг дэмжиж байгаагаа илэрхийлээд, гэр бүлээс гадуурх харилцааны улмаас гэрлэлтээ цуцалж байгаа тохиолдолд буруутай этгээдэд мөнгөн төлбөр оногдуулах асуудал тусгасан эсэх, гэрлэлт бүртгүүлэх үед садан төрлийн гэрлэлт, цус ойртолтоос сэргийлэх талаарх зохицуулалт туссан эсэх талаар, Улсын Их Хурлын гишүүн Н.Учрал угийн бичиг хөтлөх асуудлыг сүүлийн үеийн дэвшилтэт технологи ашиглахыг хуульд тодорхой тусгах шаардлагатай талаар дурдаад хүн амын удмын сангийн аюулгүй байдлыг хангахад угийн бичиг хөтлөх талаар тусгасан нь үр дүнтэй хэрэгжих боломж байгаа эсэх талаар, Улсын Их Хурлын гишүүн Ш.Адъяаа гэр бүлээ цуцлуулсны дараа хүүхдийн тэтгэлэг төлүүлэх үүрэг, хариуцлагыг биелүүлэх талаар шинэ зохицуулалт туссан эсэх, гадаад улсын иргэдэд хүүхэд үрчлэх асуудал, цаашид гарах үр дагаврыг хэрхэн зохицуулсан талаар, Улсын Их Хурлын гишүүн Ц.Сандаг-Очир хуулийн төслийг үзэл баримтлалын хүрээнд хэлэлцэхийг дэмжиж байгаагаа илэрхийлээд, садан төрлийн хүмүүс хоорондоо гэрлэж байгааг хэрхэн тогтоож,

урьдчилан сэргийлэх, мөн ижил хүйсийн хүмүүс гэр бүл болон хамт амьдрах талаар зохицуулалт байгаа эсэх талаар асуулт асууж, хариулт авсан болно.

Гэр бүлийн тухай хуулийн шинэчилсэн найруулгын төсөл болон хамт өргөн мэдүүлсэн хуулийн төслүүдийг Байнгын хорооны хуралдаанд оролцсон гишүүдийн олонх буюу 76.9 хувь нь үзэл баримтлалын хүрээнд хэлэлцэхийг дэмжиж, чуулганы нэгдсэн хуралдаанаар хэлэлцүүлэх нь зүйтэй гэж үзсэн болно.

Улсын Их Хурлын эрхэм гишүүд ээ,

Гэр бүлийн тухай хуулийн шинэчилсэн найруулгын төсөл болон хамт өргөн мэдүүлсэн Гэр бүлийн тухай хуулийг хүчингүй болсонд тооцох тухай, Иргэний улсын бүртгэлийн тухай хуульд өөрчлөлт оруулах тухай, Эвлэрүүлэн зуучлалын тухай хуульд өөрчлөлт оруулах тухай, Иргэний хэрэг шүүхэд хянан шийдвэрлэх тухай хуульд нэмэлт, өөрчлөлт оруулах тухай, Гадаадын иргэний эрх зүйн байдлын тухай хуулийн зарим заалтыг хүчингүй болсонд тооцох тухай, Иргэний хуульд нэмэлт, өөрчлөлт оруулах тухай, Шүүхийн шийдвэр гүйцэтгэх тухай хуульд нэмэлт оруулах тухай, Эд хөрөнгийн эрхийн улсын бүртгэлийн тухай хуульд нэмэлт, өөрчлөлт оруулах тухай, Зөрчлийн тухай хуульд нэмэлт оруулах тухай, Зөрчил шалган шийдвэрлэх тухай хуульд өөрчлөлт оруулах тухай хуулийн төслүүдийг хэлэлцэх эсэх талаарх Хууль зүйн байнгын хорооны санал, дүгнэлтийг хэлэлцэн шийдвэрлэж өгөхийг Та бүхнээс хүсье.

Анхаарал тавьсанд баярлалаа.

**ХУУЛЬ ЗҮЙН БАЙНГЫН
ХОРООНЫ ДАРГА**



Д.ЦОГТБААТАР